

– Ուզում էի քեզ սպանել, – պատասխանում է աւազակը եւ, չոքելով նրա առջեւ, գրկում է նրա ոտները:

– Ինչո՞ւ չսպանեցիր, – հարցնում է Չայրիկը վեր բարձրացնելով նրան:

– Աստուած իմ ձեռքը բռնեց, – ասում է քուրդը եւ սկսում է պատմել, թէ որպէս Չայրիկի թշնամիները կաշառեցին նրան, եւ որպէս ինքը խոստացաւ կատարել այդ եղեռնագործութիւնը, բայց խղճի ձայնը ասաց նրան, թէ պէտք չէ սուր բարձրացնել, աստուծոյ օրհնեալի վրայ:

– Դու էլ օրհնեալ լինիս, որդի, – ասում է նրան Չայրիկը: – Գնայ խաղաղութեամբ, բայց այդ բոլորը, ինչ որ պատմեցիր ինձ, ուրիշ ոչ ոքի չպիտի յայտնես:

– Դու խնայո՞ւմ ես քո թշնամիներին, – հարցնում է աւազակը զարմանալով:

– Աստուած այդպէս է պատուիրում, – պատասխանում է Չայրիկը:

Բայց, չնայելով Չայրիկի պատուերին, քուրդը ամէն տեղ պատմում է նրա կեանքի դեմ դաւադրութիւն սարքող անձինքների անունները, եւ այդ լսում է ամբողջ քաղաքը:

– Ովքե՞ր են այդ դաւաճանները, – հարցրեց Ասլանը:

– Մի քանի եկեղեցականներ, միացած մի քանի աղաների հետ, որոնց պարագլուխն է մեր քաղաքի սրբազան առաջնորդը, – պատասխանեց արեղան:

– Ինչ՞ն էր առիթ տոնել նրանց՝ մինչ այդ աստիճան անիրաւութեան դիմել, թափել տալով մի անմեղ արիւն, – հարցրեց Ասլանը փոքր-ինչ զայրացած ձայնով: – Միթե՞ դպրոցը, լոյսը, կրթութիւնը այդքան ատելի է նրանց:

– Ես չեմ կարծում, – ասաց արեղան, – որ նրանք լուսաւորութեան թշնամի են եւ այդ պատճառով զինորուում են նրա տարածողների դէմ: Նրանք չեն կարող թշնամի լինել լուսաւորութեան, որի մասին ամենեւին հասկացողութիւն չունեն, որի վրայ երբեք չեն մտածել: Խնդիրը բոլորովին տնտեսական է: Մի ժամանակ, որպէս քանի թուրք առաջ ասեցի, այդ վանքում կանոնաւոր տնտեսութիւն չկար. նրա եկամուտները վատնում էին միաբանները, եւ ինչ էլ որ մնում էր, առաջնորդի կոկորդովն էր անցնում: Բայց երբ Չայրիկը վանահայր դարձաւ, նախ վանքը մաքրեց անպիտան միաբաններից, նրանց փոխարեն խմբեց այստեղ աւելի արժանաւոր անձինք, եւ այնուհետեւ վանական արդիւնքները սեփականացրեց իր նոր կառուցած հիմնարկութիւնների պահպանութեան համար: Այդ բոլորից յետոյ, շատ բնական է, որ այն